

華嚴經普賢行願品疏卷十

唐罽賓國三藏般若奉詔譯

澄觀述疏

◎勝熱婆羅門九住章

△第九勝熱善友，寄王子住。從法王教，生於正解，當紹佛位故。文亦具六。

爾時善財童子為菩薩無勝幢解脫門光明照其心故。

第一依教趣求中亦二。一證前。二趣後。前中亦二。先明證因。因前解脫。

得住諸佛不思議境界種種神通力。證菩薩不思議解脫種種神通智。得菩薩不思議三昧智光明。得一切時恆熏習三昧智光明。得遍了知一切境界皆依想所住三昧智光明。得入一切世間具足殊勝智光明。以得如是智光明故，於一切處皆隨現身。隨一一身以究竟智皆悉演說究竟平等無二無別無分別法。以明淨智普照境界。凡所聽聞甚深解脫清淨法藏皆能忍受。信解清淨，決定明了。諸法自性無有疑惑。心恆不捨修習一切菩薩妙行。

後得住下，正明得益。於中復二。先得自分益。

勇猛精進，趣一切智，無有退轉。獲得十力差別智光。愛樂深法，常無厭足。以正修行，住一切智。其心正向佛境界。出生菩薩廣大莊嚴。圓滿無邊清淨大願。以無障礙智，知無邊世界網。以無懈怠心，度無邊眾生海。普遍了達無邊菩薩諸行境界。普見無邊一切世界種種差別。普入無邊廣狹粗妙一切世界。普知無邊一切世界種種想網。普知無邊一切世界諸安立諦。普了無邊一切世界言辭稱讚。普知無邊一切眾生種種信解。普知無邊一切眾生成熟時節。普知無邊一切眾生種種心想。普見無邊一切眾生種種色相。隨其所應，方便成熟。

後勇猛精進下，得勝進益。

念善知識，漸次遊行，至伊沙那聚落。

二念善知識下，趣後。

見勝熱婆羅門修諸苦行，於赫日中，四面火聚，猶如大山。中有刀山，高峻無極。為欲勤求一切智智，登彼刀山，投身入火。

第二見勝熱下，見敬諮問。於中二。先睹見。後敬問。

今初。見修苦行。四面火聚，頭上赫日，即五熱炙身。今明四句般若皆燒惑薪。故梵本舊經但云四面。中有刀山者，無分別智，最居中道，無不剖故。高而無上，峻不可登，照無始末，故云無極。故智論云，般若波羅蜜，猶如火聚，四邊不可取，遠離於四句，四句即四邊，取則燒人，離則成智。謂若以有為有，則有縛等。故論云，若人見般若，是則為被縛，若不見般若，是亦為被縛。登彼刀山投身入火者，從無分別智，遍入四句，皆無滯也。故論云，若得般若意，入阿毗曇門不滯有，入成實門不滯空等。又云，若人見般若，是亦得解

脫，若不見般若，是亦得解脫。故謂失意為謗，謂增益等，如被火燒。得意為門，四皆入理，如觸不熱。又火有四義。一燒煩惱薪。二破無明闇。三成熟善品。四照現證理。又釋。刀是斷德，無不割故。火是智德，無不照故。投身下者，障盡證理故。斯皆以刀山為能證，火聚為所證。故此火等即是法門。不須別表。現所用故，稱性事故。此為甚深，難解難入，不可輕爾。

時善財童子既至其所，頂禮其足，合掌而立，白言，聖者，我已先發阿耨多羅三藐三菩提心。而未知菩薩云何學菩薩行，云何修菩薩道。我聞聖者善能誘誨，願為我

說。

二時善財下，敬問可知。

△第三婆羅門言下，正示法界。行於非道，略無稱讚。於中有六。一示法勸修。二疑憚不受。三勝緣勸引。四疑盡悔愆。五誠勸見容。六依教修證。

婆羅門言。善男子，汝今若能登此刀山，投身火聚。諸菩薩行悉得清淨。

今初。然刀山不可執，火聚不可取。若能不住無分別智，遍入四句。則遠四謗，不滯空有，何行不成。所以要令入者，破見心故。令解菩薩深密法故。順相易知，逆難知故。法在修入，不在言故。然此中示癡。甘露火王示瞋。天友示貪。顯三毒相，普有正法，即是道故。然有五義。一當相即空，空故為道。非此三事即是佛法。諸部般若其文非一故。說三毒四倒諸惑，即深般若，體性清淨。二約用攝生，故名為道。亦非即是。故淨名云，行於非道，通達佛道。先以欲鉤牽，後令入佛智等。三在惑用心，故名為道。如俗流輩，未能絕事。

雖目睹練色，口納滋味，受用五境。而內策觀心，知空知過，漸得微薄。亦非即是。四留惑潤生，長菩薩道，故名為道。亦非即是。如淨名云，不入生死大海，則不能生一切智寶等。五當相即道。不同前四。不思議故。不可定言惑與不惑，空與不空。無行經云，婬欲即是道，恚癡亦復然，如是三法中，具一切佛法。大意同此。大士云，無量癡心本是道，三毒四倒不思議。即斯意耳。

時善財童子作如是念，得人身難。離諸難難。得無難

難。

二時善財童子作如是念下，疑憚不受。非惜身念，恐失道緣。示智未深，故生此念。於中二。先明道緣難具。後正疑魔壞。今初。有十三難。初三為總。後十為別。總中，初得人身難者，人是福田，受道器故。次二句就人身中須離八難，謂世智辯聰及生聾盲，此二屬身，故名為得。無此二者，名得無難。餘之六難，但約時處，故但云離。

離惡法難。得淨法難。遇佛出世難。具足諸根難。得聞

正法難。得遇善人難。逢真善知識難。受如理正教難。
得正命自活難。得隨法修行難。

後十別中，初二句惡止善行，是離難因。餘八正離。一
遇佛出世，則非前後。二具諸根者，顯非聾盲。三得聞
正法，非長壽夭。四得遇善人，非三惡趣。五逢真善
友，必離北洲。六受如理教，明非世智。上已離八難。
七復離四邪五邪。八復隨法修行，道果可就。願為道
器，安得自輕。

此將非魔，魔所使耶。將非是魔險惡徒黨，詐現菩薩善知識相，與諸菩薩而作怨敵。而欲為我作善根難。作壽命難。作梵行難。障我修行一切智道。牽我令入邪惡趣中。障我所證解脫法門。障我所求無上佛法。

後此將非魔下，正疑魔壞。初句疑善友是魔。次句疑友被魔使。後句疑是魔屬。三類皆能壞人善根。

△三作是念時下，勝緣勸引。有十四眾，各述曾為勝熱化益，故勸勿疑。略分為四。初一色天。次六欲天。三有六眾，即八部。四有一眾，即地獄天子。

作是念時，十千梵天住虛空中，作如是言，善男子，莫作是念，莫作是念。

今色天中多是初禪，以自說言為能作故。文中三。初總勸勿疑。二彰其本意，三自述蒙益，今初。由下二段，故勸勿疑。

今此聖者得金剛燄三昧光明。

二今此聖者下，彰其本意。於中二。先總示所得。謂智

慧堅利，猶如金剛，即前刀義。燒諸惑薪，發諸智燄，即前火義。燒而常寂，為三昧光。

發大精進，勇猛不退，誓入生死，度諸眾生。欲竭一切諸貪欲海，欲截一切諸邪見網，欲燒一切諸煩惱薪，欲普運度諸險難積，欲盡除斷老病死怖，欲盡吹壞無明障山，欲普引導出惑稠林，欲放一切妙法光明普照三世愚癡黑闇。

後發大精進下，別示業用。文有九句。初總。餘別。別中，一即火能乾竭。二刀能斬截。三火能焚燒。四刀能

越險。五刀能斷割。六火能破闇。義兼於風。風發火故。故緊那羅中火內起風。七火能照導。八火能放光。故並不離刀山火聚。以此會前將對法門非為臆說。

善男子，我諸梵天，執著邪見。皆悉自謂是自在者，是能作者，我為一切世間最勝。

三善男子我諸下，自敘蒙益。於中二。先自述邪見。以劫初時，世界既成，梵王先降。念處空曠，光音下生。不了業因，妄謂己作。故為邪見。

此婆羅門五熱炙身時。其火光明，照我宮殿。我即開悟。於自所居，及諸禪定，心無樂著。皆共來詣婆羅門所。時婆羅門以神通力，即為我等現大苦行。令我滅除一切邪見。為我說法。令我斷除一切憍慢。普為一切世間眾生住於大慈。行於大悲。起廣大心。發菩提意。住堅固願。欣求解脫。常見諸佛。恆聞妙法。於一切處心無所著。能轉一切圓滿法輪。其聲無礙，普遍一切。

後此婆羅門下，述得勝益。文顯可知。此下十二眾，皆以復有十千而為段首。

復有十千諸魔天眾，住虛空中，以天摩尼寶散婆羅門上。告善財言，善男子，此婆羅門五熱炙身時，其火光明映奪我等所有宮殿及身瓔珞諸莊嚴具，一切光明皆如聚墨。令我於中不生樂著。我與眷屬來詣其所。時婆羅門為我說法，令我及餘無量天子諸天女等於阿耨多羅三藐三菩提得不退轉。

次六欲天中，即分為六。一即魔天。

復有十千他化天王，於虛空中各散天華。作如是言，善男子，此婆羅門五熱炙身時，其火光明映奪於我所有宮

殿瓔珞嚴具，一切光明皆如聚墨。令我於中不生愛著。即與眷屬來詣其所。時婆羅門為我說法，令我身心而得自在。於煩惱中而得自在。於受生中而得自在。於壽命中而得自在。於業障中而得自在。於諸三昧而得自在。於莊嚴具而得自在。於菩提心而得自在。乃至能於一切佛法而得自在。

他化開出。欲界主故。二即他化自在。今轉世自在，得十自在。此即八地十種自在。一心自在者，無量三昧，皆入出故。二煩惱自在，當彼如意。如意所成，由惑不拘故。三生自在，一切世界中生故。四命自在，不可說

劫住持故。五業自在，如現生後能示現故。六三昧自在，當解自在。解即勝解，謂於境印持，轉變自在，由三昧故。七莊嚴自在，即財自在。一切世界無量莊嚴故。八菩提心自在，即願自在。菩提心以願為主故。願則隨心之所欲故。九即法智二種自在。法謂無邊法門示現。智謂如來力無畏等。能觀所觀一切佛法無不攝盡。所以合者，或未如八地故。或遺脫故。三化樂，四知足，五時分，六忉利，文並可知。

復有十千化樂天王住虛空中，作天音樂。以美妙聲恭敬

供養。作如是言，善男子，此婆羅門五熱炙身時，其火光明照我宮殿諸莊嚴具，所有光明隱蔽不現。能令我身及諸采女於五欲中不生愛著。不受欲樂。身心柔軟。即與眷屬來詣其所。時婆羅門為我說法，能令我等心得清淨。心得明潔。心得堪能。心得純善。心極柔軟。心生歡喜。乃至令得具足十力清淨智身。出生無量清淨色身。演出無量清淨言辭。出生無量如來音聲。悟入無量如來之心。具足獲得一切智智。

復有十千兜率天王天子天女無量眷屬，於虛空中起諸香雲，雨眾妙香，恭敬供養。作如是言，善男子，此婆羅門五熱炙身時，光照我宮，令我諸天及其眷屬於自宮殿

不生愛著。不貪欲樂。來詣其所。時婆羅門為我說法，能令我等斷除一切五欲愛著。少欲知足。心生歡喜。心得充滿。生諸善根。發菩提心。乃至圓滿一切佛法。

復有十千夜摩天王并其眷屬天子天女前後圍繞。於虛空中以天曼陀羅華，摩訶曼陀羅華，拘蘇摩華，散婆羅門上，恭敬供養。作如是言，善男子，此婆羅門五熱炙身時，光照我宮，能令我等集會之時，於天音樂，不生貪著。亦不愛樂己身眷屬。來詣其所。聞其說法。於諸欲樂悉生捨離。迴向趣求一切佛法。

復有十千三十三天帝釋諸王。并其眷屬天子天女前後圍繞。於虛空中雨天衣服，眾寶瓔珞，天莊嚴具，拘蘇摩華，恭敬供養。作如是言，善男子，此婆羅門五熱炙身時，光照我宮，令我天眾於其宮殿殊勝集會遊戲園林。天諸音樂娛樂之處，不生愛樂。即與眷屬來詣其所。時婆羅門為我等說，一切諸法皆悉無常。遷流變動，敗壞磨滅。令我斷除憍慢放逸。令我愛樂無上菩提。善男子，我當見此婆羅門時，須彌山頂六種震動。我等諸天見是相已，極生恐怖厭離之心。即時發起阿耨多羅三藐三菩提意。咸願趣求一切智智。

復有十千諸大龍王，所謂伊羅鉢那龍王，難陀龍王，優波難陀龍王等，於虛空中布大香雲。普雨無量隨時栴檀微細香雨。無數龍女奏天音樂，雨天妙華，及天香水。恭敬供養。作如是言，善男子，此婆羅門五熱炙身時，其火光明照我宮殿，令諸龍眾離熱沙怖，金翅鳥怖。除滅瞋恚，身得清涼。心無垢濁，泰然安隱。復為我等如應說法。聞法信解，厭惡龍趣。以至誠心，悔除一切諸惡業障。乃至發阿耨多羅三藐三菩提心，究竟安住一切智智。

三有六段，八部中，唯闕摩羅伽。前闕四王，八部中

攝。六中，一即龍王，即當西天。

復有十千諸夜叉王，於虛空中各以種種上妙供具，恭敬供養此婆羅門及以善財。作如是言，善男子，此婆羅門五熱炙身時，能令我等及諸眷屬，悉於眾生發慈愍心。一切羅剎鳩槃荼等亦生慈心。以慈心故，於諸眾生無所惱害，能施安樂。各與眷屬俱來見我。我及彼等即共來詣婆羅門所。時婆羅門為我說法，能令我等一切皆得身心安樂增長威力。又令無量夜叉羅剎鳩槃荼等，發於無上菩提之心。

二夜叉王，即當北天。

復有十千乾闥婆王於虛空中作如是言，善男子，此婆羅門五熱炙身時，其火光明照我宮殿及諸眷屬，悉令我等受不思議無量快樂。是故我等來詣其所。此婆羅門為我說法，能令我等於阿耨多羅三藐三菩提得不退轉。

三乾闥婆眾，即當東天。南天攝在夜叉之中，能統是天。今從所統，義如前說。

復有十千阿脩羅王，從大海出，住虛空中，舒右膝輪，

合掌禮敬。作如是言，善男子，此婆羅門五熱炙身時，我阿脩羅所有宮殿，大地諸山，悉皆震動。大海波濤，涌浪騰沸。令我眷屬失其威力。捨憍慢心。離諸放逸。息除戰鬥傷害之心。是故來詣婆羅門所。從其聞法。永離諂誑。入深法忍。住於三昧。成就十力。堅固不動。

四阿脩羅。

復有十千迦樓羅王，大力勇持迦樓羅王而為上首。於虛空中化作廣大童子之形，容貌端嚴，色相具足。於虛空中唱如是言，善男子，此婆羅門五熱炙身時，其火光明

照我宮殿。一切震動。而令我等皆悉恐怖，不樂住處，生厭離心。來詣其所。時婆羅門即為我等如應說法。能令我等修習大慈。增長大悲。令其精進。不捨善軛。令於五欲拔出眾生。令其發起大菩提心。令入甚深清淨法界。令其獲得明利智慧。方便善巧，調伏眾生。

五迦樓羅。上五並顯。

復有十千緊那羅王，於虛空中唱如是言，善男子，此婆羅門五熱炙身時，從火燄中，有大風起。吹我宮殿，園林池沼，寶多羅樹，諸寶鈴網，諸寶繒綵，瓔珞鬘帶，

諸音樂樹，諸妙寶樹，及諸樂器，一切資具，咸皆震動。自然演出佛聲法聲，及不退轉菩薩僧聲，發起大願菩薩道聲，住於無上正等覺聲。

六緊那羅，略分為四。一總顯因風聞聲。

云某方某界某國某處有某菩薩，發菩提心出生大願。某方某界某國某處有某菩薩，修行苦行，於身命財難捨能捨。某方某界某國某處有某菩薩，為速圓滿一切智智，積集菩薩功德妙行，乃至究竟無作法門。某方某界某國某處有某菩薩，往詣道場，坐菩提樹，降魔軍眾，成等

正覺。乃至某方某界某國某處有某如來，轉大法輪。某方某界某國某處有某如來，作佛事已，而般涅槃。

二云某方下，別示所聞。

善男子，假使有人以閻浮提地及草木一切所有末為微塵，此微塵數可知邊際。我宮殿中寶多羅樹乃至樂器莊嚴具等所出音聲，演說菩薩名如來名法名僧名，所發大願，所修諸行，及佛菩薩所遊所住，所說所化，無有能得知其邊際。

三善男子假使下，校量聲多。

善男子，我等以聞佛聲法聲菩薩僧聲菩薩所住行願聲故，生大歡喜，來詣其所。時婆羅門即為我等如應說法。令我及餘無量眾生於阿耨多羅三藐三菩提得不退轉。

四善男子我等下，聞聲成益。

復有無量欲界天子，現高大身，住虛空中，以諸種種上妙供具恭敬供養。

四地獄天子。然此一類。從地獄出，義通六天，此同隨好品中兜率天子。文中二，先明現身。

作如是言，善男子，此婆羅門五熱炙身時，其火光明，下照阿鼻及諸地獄。諸所受苦悉令休息。我等遇此光明照故，心生淨信。以信心故，罪垢除滅。從彼命終生於天中。

後作如是下，正明說益。於中三。初遇光生天。即曾於乘急，以戒緩故墮於地獄。道根時熟，遇光生信。若不

爾者，五熱常照，地獄應空。

以慚愧故，為知恩故，捨離欲樂而來其所。恭敬戀仰，無有厭足。

二以慚愧下，知恩報德。故隨好中天鼓勸云，汝等應當知恩報恩。不知恩者，多遭橫死，生於地獄。蒙光生天，即是恩相。恭敬增善，即是報恩。言捨欲樂者，彼中勸云，汝等當往詣彼供養，勿復貪著五欲樂具。著五欲樂，障礙生天。諸天子，譬如劫火，燒須彌山，悉令除盡，無餘可得。貪欲纏心，亦復如是。終不能生念佛

之意。今此多同。

時婆羅門為我說法。能令我等及與無量百千眾生發阿耨多羅三藐三菩提心。

三時婆羅門下，聞法得益。天鼓說法，令得十地，顯是佛光。今此略明發心之益。

爾時善財童子得聞如是種種說法，心大歡喜，踊躍無量。於婆羅門所，發起真實善知識想。頭頂禮足，恭敬合掌。唱如是言，我於大聖善知識所，生不信心而懷疑

惑。唯願聖者，容我悔過。

第四爾時善財童子得聞下，疑盡悔愆。

時婆羅門即為善財而說偈曰。

若有諸菩薩 順善知識教 一切無疑懼 安住心不動
彼當決定得 諸佛自然智 降魔坐道場 廣度無邊眾

第五時婆羅門下誠勸見容。謂偈中顯勸。密誠勿疑。是許悔過。然上疑者為揀真偽。此中勸者顯其實德。魔亦能勸。何不疑勸。以此善友，前友指來。勸中正說非魔能作。善財亦得超魔眼故。若爾，何以生疑。為顯法

故。如八地中佛之七勸。縱佛不勸，豈容趣寂。為彰法深，故須勸耳。又為物軌，令審察故。

爾時善財童子聞此偈已，即登刀山，自投火聚。未至中間，即得菩薩善住堅牢清淨三昧。纔觸火燄，復得菩薩寂靜樂神通門三昧。

第六爾時善財童子聞此下，依教修證。於中二。先正證。後自陳。今初登山投火，即是修行。得二法門，斯為證入。言未至得善住三昧者，上不依山，下不依火，

中不住空，即顯般若離於能所有無二邊。無所依故，名為善住。惑境不壞，為堅牢等。觸火得寂靜樂神通三昧者，親證般若體即性淨，心無分別，故云寂靜。現法樂住，可以怡神，寂而常用，故云神通。即此通悟，故云門也。觸即證義。故淨名云，受諸觸，如智證。

善財白言，甚奇聖者，如是刀鋒及大火燄，我身觸時，安隱快樂。

二善財白言下，即自陳所證。顯後得起說。

時婆羅門告善財言，善男子，我唯得此菩薩普圓滿無盡輪解脫。

第四時婆羅下，謙己推勝。先謙己知一。云普圓滿無盡輪者，然有二義。一智輪摧惑，照其本原，無可盡故。二反常智用。用周法界，無有窮盡。圓轉不已，所以名輪。用既無窮，故稱圓滿。

如諸菩薩摩訶薩大功德燄，悉能燒盡一切眾生諸見煩惱。安住菩薩無退轉心，無窮盡心，無懈怠心，無怯弱心，如那羅延金剛藏心，疾修諸行無慢惰心。大願風

輪，普持一切。勇猛堅誓，無有退轉。而我云何能知能說彼功德行。

推勝可知。

善男子，南方有城，名師子頻申。彼城有王，名無畏星宿幢。王有童女，名為慈行。汝詣彼問，菩薩云何學菩薩行，修菩薩道。

第五善男子南方下，指示後友。城名師子頻申者，灌頂住中，震動照曜，持世界等，皆悉自在無所畏故。王名

無畏星宿幢者，無畏即前師子。頻申城名，城因王故。星宿幢者，於法性空，羅十種智，如列宿故。智照無畏，高顯摧伏，所以名幢。女名慈行者，知眾生根令其調伏，慈為行故。智中之悲，處世無染，是謂童女。

時善財童子頂禮其足，繞無數匝，殷勤瞻仰，辭退而去。

禮辭可知。

淨空法師專集網站(簡)製作